



Xosé Antonio Vázquez Cobas voceiro do BNG e os Concelleiros- Voceiros dos Grupos Municipais do PSdeG- PSOE, **D. José Manuel Vilas Álvarez** de CIUDADANOS, **D. Juan José Chouza Sampedro** neste Concello, presentan a seguinte proposición ante a Corporación Municipal e ante o Alcalde, en relación á **Retirada da placa da Avenida Miguel Rodríguez Bautista, retirada da placa da Rúa Diego Delicado. A anulación dos nomeamentos de Fillos Adoptivos de Ribeira aos Sres. Fernando Suárez Tangil, conde de Vallellano e José María Rivera de Aguilar.**

EXPOSICIÓN DE MOTIVOS

A guerra civil e os corenta anos de ditadura deixaron un saldo enorme de vítimas de violacións graves dos dereitos humanos, incluíndo execucións, torturas, detencións arbitrarias, desaparicións, traballos forzosos, exilio, etc.

As demandas das asociacións de vítimas de xustiza, verdade e reparación non estarán suficientemente atendidas mentres a simboloxía franquista estea presente no espazo urbano. Mais aínda existen, hoxe en día, nomes de rúas, placas conmemorativas e nomeamentos de fillos adoptivos e predilectos que celebran a memoria de cargos franquistas en distintos lugares do país. Ante esta situación, a chamada Lei da Memoria Histórica e as recomendacións da ONU dos anos 2013 e 2014 emprazan as distintas administracións a retiraren toda a simboloxía que enxalza o franquismo. Moitas organizacións e grupos de persoas afectadas expoñen que, con esta simboloxía aínda en pé, seguen a considerarse vítimas de segunda categoría.

As vítimas necesitan unha reparación económica e social; pero tamén moral. A retirada de toda a simboloxía enaltecedora da ditadura franquista é unha das primeiras medidas reparadoras que cómpre adoptar. O consenso xeral das distintas administracións democráticas de España (incluídos os concellos) sobre o tema dos honores e distincións descansa en que, detrás de honores e distincións, materializados por exemplo nos nomes das rúas e prazas, está a idea enxalzar publicamente determinados procedementos, e que estes procedementos e actitudes servirán de pautas exemplarizantes e modelos e inspiración de actuación cidadá. Trátase, en definitiva, de patróns de comportamento que vinculan os cidadáns cos principios de conduta dun sistema social e democrático.

A actuación das administracións públicas, neste sentido, debe encamiñarse cara á procura da consideración xeral dos cidadáns, prestixiando a persoas ou institucións que promovan valores de diálogo, paz ou defensa da cultura como medio de

convivencia entre os diferentes pobos. Por esta razón, as leis referidas a honores e distincións buscan o máximo acordo e consenso.

Tendo en conta todo o exposto ata aquí, o feito de manter en Ribeira unha rúa dedicada a Miguel Rodríguez Bautista, alcalde franquista durante 18 anos, os máis duros e represivos da Ditadura, cando moitos compatriotas estaban encarcerados, fuxidos ou mesmo forzados ao exilio, non deixa de ser unha intolerable inxustiza e un despropósito democrático. Trátase dun alcalde posto a dedo polas autoridades franquistas. Un alcalde que asumiu, na súa integridade, a función de xefe do partido único fascista, responsable de miles de paseados entre os nosos compatriotas. Unha persoa que non só desempeñou, de bo grado, o posto de máxima autoridade franquista en Ribeira; senón que, ademais, buscou o ascenso social a través do partido fascista, converténdose ao longo de tres lexislaturas (1949-1959) nun procurador en Cortes, e que asumiu cargos en tódalas esferas (local, provincial e estatal reafirmando, deste xeito, o seu compromiso coa Ditadura.

Mais aquí entra en xogo, tamén, a figura de Diego Delicado. Porque foi o devandito alcalde Miguel Rodríguez o que, por motivos persoais, moveu os fíos para conseguir que un personaxe coma el, sen ascendencia social ningunha con Ribeira, conseguise unha rúa na cidade, reafirmando, deste xeito, os lazos de interese persoal entre el e este cargo franquista, naquela altura presidente da Deputación Provincial. Os intereses persoais de ascenso social alimentábanse mutuamente. Por iso non é de estrañar que fose tamén Miguel Rodríguez quen se encargase de nomear fillo adoptivo ao conde Vallellano, Fernando Suárez de Tangil, o 19 de Xullo de 1952. Esta mesma distinción entregóuselle ao subsecretario José María Rivera de Aguilar, coa complicidade dunha ditadura xurdida dunha guerra civil, que causou o terror e un atraso de décadas na sociedade española. Unha ditadura responsable de miles de mortos, detidos e desaparecidos, que trouxo tanta dor e miseria como teñen demostrado inxentes investigacións. Esta ditadura e os seus cargos utilizaban as institucións para dignificaren persoas que coa súa actuación eran responsables dunha volta atrás sen precedentes na España contemporánea. Arruinaron ética, social, política e economicamente ao país e aínda tivemos que ver como eran premiados publicamente.

En virtude de todo o exposto e ao amparo artigo 15, 1. da lei 52/2007, tamén coñecida como Lei de Memoria Histórica, que literalmente di "Las administraciones públicas en el ejercicio de sus competencias, tomaran las medidas oportunas para la retirada de escudos, insignias, placas y otros objetos o menciones conmemorativas de exaltación, personal o colectiva, de la sublevación militar de la Guerra Civil y de la represión de la Dictadura"; os Grupos Municipales, Socialista, Ciudadanos, e BNG, instan ao Pleno da Corporación Municipal á adopción do seguinte,

ACORDO:

- 1. A retirada do nome da Avenida Miguel Rodríguez Bautista e cambio da nomenclatura da mesma pola de Avenida Xosé Neira Vilas.**
- 2. A retirada do nome da Rúa Diego Delicado e cambio da nomenclatura da mesma pola de Praza de Vigo.**
- 3. A anulación do acordo do pleno de Ribeira de 19-VII-1952 de nomear fillo adoptivo a Fernando Suárez Tangil, conde de Vallellano.**
- 4. A anulación do acordo plenario de Ribeira de 19-VII-1952 de nomear fillo adoptivo a José María Rivera de Aguilar.**
- 5. Deberán realizarse ditos acordos antes do 30 de xuño de 2016.**
- 6. A día de hoxe, co nivel de coñecemento que temos, os grupos municipais asinantes desta proposición, dan por cumprida a Lei da Memoria Histórica na cidade de Ribeira.**

Xosé Antonio Vázquez Cobas.(BNG).

Juan José Chouza Sampedro (C'S).

José Manuel Vilas Álvarez (PSdeG-PSOE).

Ribeira, marzo de 2016.